

Lajčák: Evropska unija je spremna da nagradi napredak u BiH



Proces integracije u EU je najbolji način da se osigura trajni napredak i stabilnost u Bosni i Hercegovini, rekao je visoki predstavnik/specijalni predstavnik EU Miroslav Lajčák zvaničnicima Slovenije tokom svoje dvodnevne posjete Ljubljani, koja se završava danas.

U razgovorima sa ministrom vanjskih poslova Slovenije Dimitrijom Rupelom, koji će 1. januara 2008. godine preuzeti šestomjesečno predsjedavanje Vijećem Evropske unije, Lajčák je naglasio pozitivni zamah koji je stvoren parafiranjem Sporazuma o stabilizaciji i pridruživanju (SSP) između EU i Bosne i Hercegovine 4. decembra. "Treba iskoristiti ovu dobru atmosferu kompromisa kako bi se zemlja približila Evropskoj uniji. Podrška EU evropskoj integraciji Bosne i Hercegovine će dati rezultate samo ukoliko nije apstraktne prirode. Parafiranje SSP-a prošle sedmice pokazalo je da je Evropska unija spremna da nagradi napredak."

Visoki predstavnik je takođe obavijestio budućeg slovenačkog predsjedavajućeg EU o rezultatima nedavnih sastanaka lidera vladajućih stranaka u BiH, koji su se obavezali da će izraditi novi državni zakon o policiji do 15. februara 2008. godine te nastaviti diskusije o ustavnoj reformi krajem januara.

Sa svoje strane, Dimitrij Rupel je izrazio punu podršku svoje

zemlje Lajčakovim aktivnostima na unapređenju reformi u zemlji, a posebno njegovom doprinosu u postizanju sporazuma o reformi policije. Rupel je potvrdio da će odnosi sa Zapadnim Balkanom biti ključni prioritet tokom slovenačkog predsjedavanja EU. Slovenija će težiti jačanju Programa iz Soluna koji obavezuje EU da svim zemljama Zapadnog Balkana pruži evropsku perspektivu, rekao je ministar.

Pozdravljajući pozitivnu političku atmosferu koja se trenutno može osjetiti u Bosni i Hercegovini, Rupel je izrazio svoje nade da će BiH ispuniti sve uslove za potpisivanje SSP-a sa EU u toku slovenačkog predsjedavanja u prvoj polovini 2008. godine. "Bosna i Hercegovina je zemlja koja je na mnogo načina povezana sa Slovenijom tako da period našeg predsjedavanja želimo iskoristiti za njenu promociju i napredak", rekao je. Opredijeljenost Slovenije je da Bosna i Hercegovina, kao i ostale zemlje zapadnog Balkana, dobije priliku da postane kandidat za članstvo u Evropskoj uniji što je prije moguće.

Tokom svoje posjete Ljubljani, visoki predstavnik i specijalni predstavnik EU se susreo i sa Antonom Kokaljem, predsjedavajućim Komisije za vanjske poslove, i Jožefom Jerovšekom, predsjedavajućim Komisije za evropska pitanja Parlamenta Slovenije, kao i sa političkim direktorom Ministarstva vanjskih poslova Mitjom Drobničem.